

嘉靖平倭祇役紀畧

第六冊 咨諭書

嘉靖平倭祇役紀畧卷六

慈谿趙文華原實甫著

提督咨 諭

咨南京兵部江海事宜



爲軍務事本部院欽奉 勅諭云云欽此欽遵
爲照南都重地三面環山易于據守惟西距江
沿袤數十里之間皆可衝犯賊若駕巨艇乘風
潮卒至聚險分劫越蔣山之麓而窺金陵之巔

建瓴而下

寢廟驚矣本部奉

勅前來保障

南京責任重大殊深祇惕幸今瓜揚之間報稱
賊遁地方稍安但賊情叵測入犯內地年復漸
深倘有奸逆引導由瓜儀以至燕磯下關等岸
則如前所慮未可目之爲迂也本部前督察時
嘗攷 祖宗舊制自儀真以下至松江金山設
立備倭總督一員控長江而橫大海督率衛所
官軍輪番出哨與松江兵船會哨于海島楊山

許山之間但有賊船行使則哨船各報沿邊水寨協力夾攻故海口嚴而江防自密江防密則楊鎮內地恬然安堵其爲拱護京都防維運道之意何如其至也今南京上新河置列操江船隻內外守備與操江衙門時常操閱而操江都御史兼轄巡江御史起自南京直抵松江舊制固在方今防禦之策莫若修明舊制量爲分畫各列兵船屯劄要害如南京對過浦子口瓜埠

共置操江船若干隻擇要害幾處屯至儀真而止哨至瓜州而止此爲一節揚州對過常鎮共置江防船若干隻擇要害幾處屯至狼山福山而止哨至海口而止此爲二節海門通州守禦所及呂四等場對過蘇松劉家河吳淞江共置海防船若干隻擇海口要害屯列水寨共會哨楊山許山而止爲第三節則處處有兵節節皆備加以操演精熟賞罰嚴明萬一有警則操江

之兵又可以互相策應如此不惟江防萬全南京無恐而爲蘇松海防計因以居其半矣再加之歲本部會題海防事宜逐一修舉則藩籬門戶無不慎固而江海之寇何由深入哉留都要務無出於此顧本部素質愚昧恐于人情地理未能周知兵政國體尙多窒碍用是奉咨貴部仍轉行內外守備操江各該衙門詳議如果可行卽煩請定操江屯哨船隻合用大小數目并

應修應造應支銀兩之類俱煩明白回咨以憑
具題施行上慰宵旰之勤下解瘡痍之急不
負同寅之義而允塞保障之責也須至咨者

咨撫操各衙門江海事宜

爲軍務事先該本部院會題海防事宜詳于江
南而于江北稍畧查得通泰等處頻年亦遭倭
患此誠留都門戶不可不加扃密訪得淮揚沿
海多有魚鹽之利民灶雜居捕販爲業習學武

藝慣使鎔標若行召募可得精勇三千名製造
下海雙桅沙船一百餘隻給令駕使以一千名
於通泰駐泊與福山把總相爲犄角抗拒狼山
以一千名于呂四江家場駐泊拒賊登岸以一
千名出哨淞江洋與臨山哨船會合益張聲勢
各設把總統領又須專官總理似應題設副
總兵鎮守淮揚如此則上下海防嚴固周密而
腹裏地方可保無虞矣其召募地方俱屬淮揚

防海副使管轄但召募工值均宜從厚非揚州一府所能措處而製造雙桅沙船亦難責成一府况防守事件相關甚遠應于江南北各府派徵錢糧先該本部將應用江海船隻咨行南京兵部及撫操等衙門詳議去後今據各回咨前來議覆僉同相應修舉以固防守已經劄行本部郎中陳茂禮前去再加會議外合行貴院卽會同本官督同海防淮揚道及淮安揚州常州

鎮江四府掌印官詳議海防江防船隻二樣動
支某項銀若干兩卽便選委勤幹官一員專理
其事措辦木料灰釘等項拘集慣造木匠于空
便去處開廠興工製造江防船若干隻海防若
干隻大小丈尺若干務要堅固便利可裨實用
貴院仍預召募沿江沿海民竈慣使鎗標武藝
精熟及慣行船之人充爲水兵水手乘駕演習
事完之日將用過錢糧造過緣由咨報以憑具

奏施行

咨漕運陳都御史防守揚州

爲軍務事照得揚州咽喉重地兵力單弱所當
屯兵聚守本部奉 命疏通運道保障 留都
故于此地首宜加意已將河南都司吳子英部
下睢陳等兵二千員名令其屯劄通衢防守揚
州一遇有警移營截殺見今本部渡江征勦勢
難遙制幸而貴院駐劄本地可以斟酌調度事

權有歸俟調兵稍齊再發二枝協守爲此煩將
前項官兵嚴督吳子英整齊行伍恪守紀律時
常操練毋得偷安貴院申明閱視之期親加犒
勞敢有騷擾民間者嚴行軍法示衆又客兵遠
來不知地利未諳賊情仍預選向導哨探諸役
以備有警遣用使客兵知趨避并煩行文揚州
府將軍中應用器件日逐口糧照例給與不令
缺乏嗣後調兵續到者查照施行江防務要更

祈大才展布經畧內外重地均有賴矣

咨總督胡侍郎海防事宜

其中防守出哨屯田練兵極爲

詳悉正今時急務

軍務事照得倭寇猖獗迄今五載本部院遵奉
勅旨提督諸路官兵前來征勦仰仗 朝廷
威靈及貴部才畧二三帥臣忠勇上下同心幸
已勦絕無容別議今事勢雖定顧夷性奸狡輕
獍鼠竊狗偷之患或乘我無備有時復發善後

之策不可不講先該本部督察會同貴部條陳
海防長策內題設立總兵參將等官防守海上
每遇風汛時月各路參將分守馬蹟楊山大衢
而總兵屯舶陳錢仍督各路參將不時會哨已
經奉有 欽依蓋禦倭之策宜防于海而海防
要地則陳錢爲衝查得倭船自五島開洋必由
天堂官渡歷李西嶼壁下至陳錢島分艚正西
則犯浙江西南則犯福建西北則犯江南江北

是陳錢乃賊必由之路而界近寧波故浙江居
東南上游爲南京屏障并力守浙則江南北可
守而江防亦自固矣所謂守浙乃守陳錢也但
陳錢去海外千餘里風波之險人情所畏仍恐
官兵止于近島唐塞未必遠哨今後每遇汛期
煩貴部駐劄定海督令將官分屯信地俱會哨
陳錢海道副使駐劄舟山往來巡視有警將官
分投堵截無使越過信地登岸失事總參海道

官一體論罪則無唐塞之患此前題請所未
盡煩貴部努力行之此其一也國初於沿海
衝地設烽墩塘鋪分軍瞭哨遺址尙存先該本
部督察駐劄松江查得乍浦青村一帶俱係衝
地行松江知府方廉將舊設獨樹金山等營墩
鋪申請督撫用無碍官銀逐一修復因賊充斥
中止今煩貴部將沿海衝地北自江北南至漳
泉舊設墩鋪查明若干各責地方守巡官漸次

修復其極衝地面如定海吳淞等處照內地敵臺式樣視海口寬窄各添築敵臺二三十座自高臨下遏之于岸水陸夾擊則賊豈能飛渡如果工程浩大費用不貲卽煩 題請此其二也先該本部督察行溫州知府龔秉德于浙東海島地面備查舊制曾經設有船哨水寨屯地者開報據申內稱海島膏腴之地舊曾立所設司開墾爲屯者如寧之岱山大謝金塘九山台之